

Jahreschronik 1941

Autor(en): **[s.n.]**

Objektyp: **Article**

Zeitschrift: **Schwyzerlüt : Zyttschrift für üsi schwyzerische Mundarte**

Band (Jahr): **4 (1941-1942)**

Heft 1-3 [i.e. 4-6]

PDF erstellt am: **16.07.2024**

Persistenter Link: <https://doi.org/10.5169/seals-179032>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Jahreschronik 1941.

«Schwyzerlüt» möcht nöd numen e zitschrift si mit literarische biträgen in mundart. Si will au zeige, was för en plaz üsi eige sprochen im kulturelle läbe vom Schwizerländli ininnt. Die chräft, wo allethalben am werche sind, för desäbe de plaz z verschaffe won ehre zuechunt, möcht si z ehre züche. Si söled ali bekant werde, so wit mer si kened. Si sind manigfaltig und erstunlich vilsitig. Grad do drin liit ehren richtum und s gheimnis vo ehrem wirke, nochhaltig und i d tüfi. Si sind üs gsamthaft simpatisch, dene wo s pressiert, und di andere wo s gmacher nemed (vgl. üse «**Wägwisser** dür üsi schwyzerische Mundarte», Nr. 1/4, 1941). Au de läser werd sini freud ha a der garbe, wenn er au öpen am eint oder andere blüemli meh gfalle finde, je noch sim temperament und persönliche guetfinde. Mer wönd jo gär nöd ali der glüche meinig si und achtet üs gägesitig nöd desto minder dessetwäge.

Die chronik söl au witer gfüert werde. Si söl erwise, was för ne zit es gschlage hät am turm vo üsere sprochen. Es hanged vo jedem läser ab, daß mer nöd hindeno hinked mit üsem zeiger. En jedere söl üs brichte wenn er meint, mer heiged öpis wichtigs vergässe. Es hanged au vo allne liebe läser vo «Schwyzerlüt» ab, öb de zeiger gleitig vorruki, öb d stund bald einisch schlagi, wo üsi sprochen i ehrer ganze schönheit werd glänzen über de bergen und tälere vo üsrer Schwiz. —

Der usdruck «**Anbauschlacht**» hät doch das einte för sich, daß mer noch andere wörter gsuecht hät, won em geist, mit dem s Schwizervolch dra gangen ist, der eige bode go achere, besser noch chunt. Und do simmer vomesälber uf d mundart gstoße, denn mueterärden und muetersprochen die gönd zäme. «Mer pflanzed», «Us aignem bode», «Mis gärtli», «Stadt und Land mitenand», das seit üs meh als «Einsatzbereitschaft für die Anbauschlacht», oder nöd? Wer zelt die gedicht und gschichtli in mundart, wo über s eidgenössisch pflanzwerk scho gschriben worde sind? — In es par **weltsche mittelschuelen**, u. a. z Gänf und z Lausanne heißt s, daß s schwizertütsch als lersach igfüert worde seig. Das erwiist de wärt, wo üsi romanische landslüt den alemannische mundarte bimessed, en wärt för d kultur und för es bessers verstoh under eidgenosse. Wer chan üs gnauer sägen, um was för schuelen es sich handelt, was för lermittel do prucht werdet, usw.? — Was för en wichtige plaz üsi mundarten im **teaterläben** inänd, das ergit sich u. a. us der tatsach, daß der offiziell literarisch büchernochwis, zwüsched 1920 und 1930 fast 200 neu diialektlustspil afüert (vgl. «Dramatischer Wegweiser für die Dilettantenbühne der deutschen Schweiz», Verlag A. Francke AG., Bärn). Sidhär ist die bewegig gwüß nöd abgflaet. Si hät im gägeteil au ernsteri site vo der dramatische kunst erfaßt. Mer ghört vo der gründig vomne heimatteater im Aargau. Z Bärn hät es neus stuk vom **Emil Balmer** en großen erfolg gha, und andere neue spilen isch es ähnlich gange, z Basel, z Rhifelde, z Züri und z San Galle. Es werd chäch a der gründig vomne **schwizere teater** und ere **schwizere teaterschuel** gwärchet. Mer hät der idruk, säb chiem grad so wenig oni d mundart us, als de schwizere film hüt no oni di säb z denke wär. Ist nöd grad dem sis beharren uf der eigne sprochen grund deför, daß mer jezt so öpis wien en **schwizerische filmstil** händ? Die bodeständigkeit hät üs z Venedig das jor en schönen erfolg abtreit. Im Kanton Züri und im Turgi werd de **religionsunterricht** i de primarschuele mängisch in mundart gee. Mer hät halt doch müeße konstatiere, daß uf die wiis der idruk vil nochhaltiger ist. De Zürcher Schuelrot hät sich do druf entschlossen, em gebrauch vo der mundart, au ab der vierte klaß, e gwüssi freiheit izrume, wenn das für de pädagogisch erfolg rotsam schint. — Us de «Schweizer Monatshefte», möchtet mer en saz über d **Biblen** in mundart

ganz allgemein und über «De guet Bricht us der Bible uf Baselbieterdütsch» (Bibelhilfsverein Baselland, Liestal) im bsundere festnagle: «Dem Bibelkenner erschließt sich... manches neu und wer erzählen will, erhält eine treffliche Anleitung». Der erfolg vo dene Biblen ist denn au groß; so hät s «Lukasevangelium uf Bärndütsch» innert churzer zit di zweit uflag erläbt. Vom gliche verfasser, **Johann Howald**, ist au, wider dor di Evangelisch Gsellschaft z Bärn, d «Apostelgschicht uf Bärndütsch» usecho. — D «Zentralstelle für Rückwandererhilfe» weiß i sim joresrapport 1940 vo «**dialektkurse**» för zrugkerti uslandschwizer z brichte. Si sind z Züri abghalte worde, mit der understützig vo der stadt, vom kanton und vom Kaufmännische Verein. Di «Schweizerdeutsche Sprachlehre» vom **Dr. Baur**, wo bi dene kürse prucht werd, ist denn au scho i der zweiten uflag usecho. Das bewist am beste, wie groß s bedürfnis noch sonigen aleitigen ist under den anderssprachige landslüt und de frönden i der Schwiz. Mer hoffed, daß üse mitarbeiter, **Dr. Alfred Senn**, Prof. ord. för germ. Sprochwisseschaft a der University of Pennsylvania, sis alamannisch-englisch wörterbuch glii einisch cha publiziere, denn au derigi hilfsbüecher werded je länger desto beghrter, bsunders au vo site vo de wältsche. — I der «Neue Züri Zitig» werd prichtet, daß der «**Duden**», das klassisch hochtütsche wörterbuech, i de hütigen uflagen a di **300** tipisch **schwizertütsche** Wörter ufgno hät, währeddem es sich am afang elei uf s obersächsisch sprochguet hät wölle beschränke. Die zal bewist einersits d uswirkig vo der bessere pfläg, wo mer üsne mundarte lönd zuecho. Si zeiged andersits s trachte vo dene, wo för d schriftsproch verantwortlich sind, disäb fortzue z berichere, dor s zruggrifen uf d mundarte, wo am quell vom schöpferische sprochgeist stönd. Üs freut de dienst, wo mer so im größere kreis chönd erwise, dedor daß mer dem treu blibed, was üs eigen ist.

P. S., San Galle.

Winterzyt, Wärbezyt!

Liebwärti Schwyzerdütschfründe!

Im Winter tüe mir am liebste deheim öppis läse. Denn finde dLüt au am beste Zyt für gueti Mundartchost, „Schwyzerlüt“ het im Schwyzervolch scho rächt Wurzle gschlage. Es müessen aber no meh Mundartfründe zuenis stosse, bis mir en Usbau dörfe wage. Drum setzet Ech e chli für „Schwyzerlüt“ i! Wärbet üs neu Abonnänte, Fründen und Inserat! Wer vom 1. Dezember 1941 bis zum 31. Jänner 1942 neu Abonnänte wirbt, überchunt im ganze:

-
- a) für 1 neue Ab. 1 Ex. Festnummer „Heimat“ oder 1 Ex. „Wägwisser“ dür üsi Mundarte
 - b) für 2 neu Ab. 1 Ex. „Meinrad-Lienert-Gedenkschrift“ (Pris: 3.— Fr.)
 - c) für 3 neu Ab. 1 Ex. „Schweiz. Trachtenkalender, 1942“ (Pris: 4.50 Fr.)
 - d) für 4 neu Ab. 1 Ex. „Unter dem Panner des Kranichs“ (Pris: 6.— Fr.)
 - e) für 5-6 neu Ab. es Mundartbuech (frei Wahl) im Wärt vo 7.— bis 8.—Fr.
-

N. B. ab 2 neu Ab. cha me di Prise dür nes Mundartbuech im gliche Wärt ersetze (frei Wahl).

Für ganz flissigi Wärber, wo 10 oder me neu Ab. wärbe, si Spezialprise vorseh. Also los! Faht a mit frischem Muet, de wirds scho guet.

Mit Schwyzergruess

Euje G. S.